

## **1 Timoti**

### **Agau e nugau zebigeg**

Pol nug Timoti sikut wai moroun. Timoti go Esia agaig ebuan, gonugau memeg go Grik du, gonugau anag go Zuda air. Pol nug Yesus nugau ze abai marai darendai, go ze go doimai, gonugau ougab petak eun. Guzenina, Pol go Timoti uligeun gonugau igul naliu, gonun, nug dual salau mai aidabun tapai moroun. Ze go Aposel 16:1-3 ebu dareu. Pol nug Timoti go Epesus uzan Uwait nugau duailel gumarabun salau moroun.

Pol nug Timoti guzenai sikut wai moroun, “Na duailel Uwait nugau Ze abai maramoroi, na Uwait nugau petak ze tutak abai maramam. Einen, polumanemen dudu ipal agen Uwait nugau duailel eg maraporoi. Ag guzenai awaramamen, ‘Ag ee ipal i zan, ag duair i egaramamen’ ag polu ze awaramam, gonun, na Uwait nugau duailel suban gumaran. Na Kristen duailel gumarabun dudu banban goagal igul naliu sag tapai maramam. Guzenemen, agen duailel go gumaramam. Ag subantal Uwait ulagwag moron.

Pol nug koli Timoti aureun, “Epesus uzan ug beu beu dareu, gonun, na Uwait nugau duailel unum gusig suban gumaren.”

#### **Agau e sesamorabun ze**

1:1-2 Pol nug Timoti ‘Umaseu’ aureun.

1:3-20 Pol nug Timoti go Uwait nugau Ze petak pet duailel abai marabun aimai aureun. Go

ze ipal gonugau dabeleu eim i abai marabun aimai aureun.

2:1-15 Duailel Uwait nug sag subantal ulagwag muramam.

3:1-16 Dudu igul naliu ag sag duailel gumaramam.

4:1-6:21 Pol nug Timoti nugau salau suban mabun aureun.

*Pol nug gonugau ze bigegweun.*

<sup>1</sup> Iz Pol, iz Yesus Kristus nugau ze oi aidanem du. Uwait nug ig imaigeun. Ig Yesus Kristus koli alabun gumei darem. Goagen iz tapai mileimai, iz Yesus nugau ze oi aidarem.

<sup>2</sup> O Timoti, iz Yesus nugau ze abai marai darena, na nait ounab Yesus en petak emen, gonun, na izal nagwai pet. Iz na sikut e wai mizem. Iz Uwait guzenai aurem, gonugau ougab naliu eiman na isanizeimai, na en bisom peimai, Uwait, igual Memenig mui, igual Dubanou Ban, Yesus Kristus goagen na ibaiz ereg dabi, nait ounab selai damau.

*Ag polumanemen dudu agal ze i sesamoran.*

<sup>3</sup> Iz Masedonia agaig bitamoroi aimai, na gusig ze tub aizemin. Iz ze go sag na koli aizem. Iz na Epesus ban uzan daimai, Kristen dudu ze gusig awarabun aizem. Ag duailel Uwait nugau Ze abai maraimai, polu ze ipal mui gotulaimai, i abai marabun awaren. <sup>4</sup> Na dudu go gaul iman gingin mui agal embigeg agal wanimag en i abai marabun awaren. Iman gingin goen duailel ze alalanem. Gonug ag i isanaramau. Ag agal oiagab Yesus en petak aimai, gonugau salau mamamen gonug petak ag isanaramau. <sup>5</sup> Ig gusig

ze go awarem, go gonugau bigeg guzenai: igual oigeb unu tamacag daimai, igual dabeleu ig igul eg memun aimai i aiganeu, igual oigeb petak emun gusig mai daimai, ig igual oigeb nug zaiger en noumamam. <sup>6</sup> Duail el ipal ag igul naliu go uteimai, ag ze gaul gaul en ze alalanemen. <sup>7</sup> Ag duail el ipal Uwait nugau kasai ze abe mabun abai maramoroi, bo, agtal agal ze macanemenin gonugau bigeg ag suban i abiu. Ag han igul go en gusig macanem, bo, agtal ag gonugau bigeg ag i abiu.

<sup>8</sup> Ig abiu kasai ze go naliu. Du tub nug Uwait nugau dabeleu sesamoraimai, kasai ze go suban nanalamau go naliu. <sup>9</sup> Ig abiu Uwait nug kasai ze duail el igul naliu macanemen en sikut wai marab tam. Go duail el igul eg macanemen kasarabun sikut wai mareun. Go duail el ag kasai ze han i sesamoranemen, ag dudu banban agal ze i sesamoranemen, ag Uwait semuranemen, ag igul eg ipal macanemen. Ag Uwait nugau igul i sesamoranemen, ag em ebuan igul sesamorane-men. Ag agal memeagar, anaiagar wagarendai, noumanemen, ag duail el ipal han wagarendai, noumanemen. <sup>10</sup> Ag dudu ipal agal walagar abai aidanemen, ag agzozou wal igul eg macanemen. Ag duail el ipal zob imaraimai, agal salau duail el (*slev*) usalabun guzenanemen, ag polu ze macanemen, baib mabun ziwes ebu ag polu ze macanemen. Ag igul eg ipal han ag Uwait nugau Ze i sesamorabun abai maranemen. Uwait nug gonugau kasai ze guzenai dudu kasarabun sikut wai mareun. <sup>11</sup> Uwait nugau Ze Naliupet go petak pet Uwait nug iz duail el awarabun aileun. Ze Naliu gonug ig guzenai aigeu, Uwait go petak wanib

banoupet, gonun, ig gonugau wanib umkoskos wag pet ulagwag murab.

*Uwait nug Pol tapai morona, go nug Uwait 'Ese-e' aureun.*

<sup>12</sup> Yesus Kristus, igual Banou nug iz gusig milena, gonugau salau mai darem. Gonugau dabeleu eim iz salau go mabun iboin, gonun, go iz gonugau salau murabun tapai mileun. Guzenaimai, iz go 'Ese-e' aurem. <sup>13</sup> Getal, iz Yesus nugau salau i mau ebu, iz gonugau enib ebu ze biabial kuaimai, umkoskos aisisilina, gonugau du-ailel asi eg maranemin. Bo, Uwait nug iz en bisom peun, einen, izal oiab Yesus en petak i mau ebu, iz igul go guzenanemin. Ziwas go ebu, iz i abiu gonugau ameg ebu igul eg go memin. <sup>14</sup> Bo, igual Dubanou Ban gonugau ougab naliu eim iz naliu pet isanileun, gonun, iz Yesus en oiab petak aimai, duail el ipal ag en oiab noumanem, einen, iz abiu ig unum Yesus Kristus dual pezai darem.

<sup>15</sup> Ze e go petak pet. Ag ze go suban don. Yesus Kristus go em ebu duail el igul naliu macanemen imarabun alab tam, go duail el igul eg macanemen imarabun aleun. Duail el ipal igul eg macanemen, bo, agal igul eg banou tam, izal igul eg nug agal igul eg unum zilareun. <sup>16</sup> Bo, Uwait nug iz en bisom peun. Go einen, Yesus Kristus nug duail el ipal gonugau ougab selai daneu igul abai marabun guzeneun. Iz du eg pet, bo, Yesus gonugau ougab selai eim iz imacileun. Iz dorog go sul darem. Duail el ag gonugau igul iz e bilab guzeneun uli-gaimai, agal oiagab Yesus en petak aimai, ag go

dual awau muzmuz dabun iboin. <sup>17</sup> Go igual gumiganeu du banou muzmuz daneu, go noumabun iborain tam. Ig igual ameig nug go piabun iborain tam. Go tutak igual Uwait. Gonugau wanib banou mui, gonun, ig umkoskos ulagwag murab. Petak.

<sup>18</sup> O Timoti, na izal nagwai sul. Iz na gusig ze go mizem. Izal ze mui, ze getal Uwait nugau ze doimai, awaranemen dudu na en anemen mui, go tutak sag darem. Na ze go gusig pataimai, na malai du sul, igul eg mui gusig ugaramam.

<sup>19</sup> Guzenaimai, nait ounab petak emen gusig patement, nait ounab nug na igul eg memen aimai i aizamau. Dudu ipal agal oiagab nug ag igul eg memen awarebi, ag go duab tam, gonun, agal oiagab petak emen, tebil go aiwag ebu eg waneun sul guzenemen. <sup>20</sup> Himeneus zaug Aleksanda dual, ag dudu guzenai sul, gonun, iz ag Satan nugau ebeb ebu maremin. Gonun, ag Uwait koli ze biabial kuai i aurabun abiu mamam.

## 2

### *Uwait aurabun ze Pol nug Timoti aureun.*

<sup>1</sup> Iz amegai gusig ze guzenai aizem, na Kristen duail el awaremen, ag duail el ipal isanarabun en Uwait auran. Duail el ag ein ece wabun dabilanemen, go Uwait auramam. Ag umkoskos Uwait 'Ese-e' auran. <sup>2</sup> Ag emgasag gumaranemen dudu banban, King mui, duail el ipal ag gusig mui abai ag isanarabun en Uwait auran. Gonug igul go guzenaba, ig ebligeb igul eg ipal i zumau, ig oigeb selai mui daimai, Uwait nugau pigsal daimai, gonugau igul naliu tutak sesamorai dacab. <sup>3</sup> Agal Uwait auranemen igul naliu gonug

igual imaigneun du, nugau ougab siksikaneun. <sup>4</sup> Gonugau dabeleu enai, duailen unum imaraba, ag gonugau petak ze bigeg abe mamam. <sup>5</sup> Uwait tutak sag dareu. Duailen Uwait ula du dareu du go tutak sag dareu. Du go gue Yesus Kristus. <sup>6</sup> Go nug-tal a gegeulanau ebu noumaimai, duailen unum agal igul eg ebuan gonugau eseu sil gau mareun. Go guzenina, ig abiu ziwas tub Uwait nug tapai moroun ebu, go duailen unum imaramau. <sup>7</sup> Igul go en, Uwait nug iz Yesus nugau ze oi aidabun du mui, emgasag ipal ebuan duailen gonugau ze awarabun mui tapai mileun. Iz ze go polumarab tam, iz petak ze mem. Iz emgasag ipal ebuan duailen go petak ze abai maremin, ag gonugau bigeg abe maimai, agal oiagab petak amam.

<sup>8</sup> Izal dabeleu enai zobu piabun ziwas ebu dudu emgasag unum goagal oiagab Yesus en petak emen ebeag wag maimai, Uwait auramam. Ag igul naliu sag sesamoraimai, ag aiag sisil i amamen, iwai i mamamen.

<sup>9</sup> Ailel ag han awaramoroi. Ag suban dabileiban, agal iweiu mamamen. Duailen ipal agen uligaraimai, naliu ze mabun en gagaliag ulig suban salanaimai, iweiu *gol* ta, galoloi naliu ta, tibur galau naliu pet aiwag banou sil gau macanemen, guzenai iweiu mabun i dabilan. <sup>10</sup> Bo, Uwait nugau Ze sesamoramen ailel agal iweiu, go agal igul naliu. Ag igul naliu guzenebi, duailen ipal ag uligaraimai, naliu amam.

<sup>11</sup> Ailel ag dudu agal piagsal iau daimai, goagal ze suban dumamen. <sup>12</sup> Izal dabeleu enai, air tub go nug dudu Uwait nugau Ze i abai maramau. Go han gusig oimai, dudu i gumaramau. Go ze tub

i maramau, go soai damau. <sup>13</sup> Einen, Adam go Uwait nug amegai patai maimai, Ewa ses patai meun. <sup>14</sup> Adam nug amegai polu ze sesamorab tam. Bo, Ewa nug amegai polu ze go doimai, Uwait nugau kasai ze etuboroun. <sup>15</sup> Ailel agal salau go mogoi soliagwabun. Ag go guzenaimai, ag Yesus en agal oiagab petak aimai, igul naliu tutak mai daimai, agal dabeleu agtal suban gumeimai, duailel ipal en oiagab noumebi, Uwait nug ag koli imaramau.

### 3

#### *Kristen duailel gumaranemen dudu agal ze.*

<sup>1</sup> Ze e petak pet. Du tub nug go Uwait nugau duailel gumarabun du usalabun gusig dabilamau, go petak salau tub naliu mabun ougab alaneu. <sup>2</sup> Du tub go Uwait nugau duailel agal gumarabun du dabun, go igul eg ipal i macaneu. Go wau tutak dual daneu. Go iau hoboi daimai, gonugau dabeleu nugtal suban gumaneu. Go igul naliu sesamoraneu. Go uzan tuban duailel gonugau zau imarai beteimai, suban gumaraneu. Go duailel ze abai mareu du naliu daneu. <sup>3</sup> Go ze gusig asiu i zaneu. Go pigai aigsisil i aneu. Bo, go duailel ipal abai iau daimai, go abai ze eim i alalaneu. Go aiwag asiu wabun i dabilaneu. <sup>4</sup> Gonugau ug suban gumaraneu. Guzenina, gonugau gelegul agen han memeag nugau ze unum sesamoraneu. <sup>5</sup> Go gonugau ug suban i gumaraneu aba, erunai go Uwait nugau duailel gumaramau? <sup>6</sup> Du tub ulis go Yesus en ougab petak eun go nug duailel i gumaramau. Einen, go salau go oun ebu gonugau wanib wag meu aba Uwait nug getal Satan nugau

igul uligaimai, sisieun sul, go nug du go guzental sisiamau. <sup>7</sup> Du tub go uzaneim an duailel agal ameagab ebu igul naliu macaneu go nug tutak Uwait nugau duailel gumaramau. Guzenaimai, duailel ipal agen gonugau enib ebu eg ze i muramam. Go Satan nugau elet ebu i numau.

*Kristen duailel isanaranemen dudu.*

<sup>8</sup> Dudu ag Uwait nugau duailel isanarabun ag han igul naliu mamamen. Ag duailel agal ameagab ebu dudu naliu daimai, ag oiagsau aliag i mamamen. Dudu go ag ze gusig asiu i zamamen. Ag duailel ipal polumaraimai, goagal aiwag wabun i dabilamamen. <sup>9</sup> Ag agal oiagab oug, ag Uwait nugau ameg ebu ze tamacag abe maimai, Uwait nugau petak ze en agal oiagab petak emen go gusig patai damamen. <sup>10</sup> Ag dudu ipal agen agal igul macanemen go bimaiag peimai, agal igul iboin ebi go petak ag salau go mabun iboin. <sup>11</sup> Agal walagar han guzental igul naliu sesamoraimai, duailel ipal agal enimag ebu ze i mamam. Ag agal dabeleu agtal suban gumeimai, agal salau unum naliu sag mamamen. <sup>12</sup> Duailel isanaraneu du go air tutak sag oi daimai, go gonugau ug suban gumaraneu. <sup>13</sup> Duailel isanaranemen dudu goagal salau naliu maimai, agal duailel ameagab ebu wanimag naliu mui damamen. Guzenaimai, ag Yesus Kristus en oiagab petak emen duailel go agal ameagab ebu tapai daimai, araog awarabun iboin.

*Uwait nugau duailel isanarabun salau go banou pet.*



<sup>14</sup> O Timoti, iz na wautab pigai alabun dabelem. Bo, iz na sikut e wai mizem. <sup>15</sup> Einen, iz na wautab pigai i alaimai ig, Uwait nugau duailel, erunai damam na aizabun agau e sikut wai mizem. Ig Uwait nugau ug sag. Uwait nug muz muz awau daneu. Zau sanag nug zau gusig pataneu sul, iguan Uwait nugau petak ze gusig patanem. <sup>16</sup> Uwait nugau wagemoun ze nugau bigeg go banou pet. Uwait nugau ze nug ig guzenai araog abai miganau,  
 'Go igual ameigeb ebu du petak usaleun.  
 Uwait nugau Ah Wes nug gonugau igul go naliu pet abai migeun.  
 Uwait nugau tibur agen unum gonugau gusig uligemenin.  
 Go sesamoranemen dudu agen gonugau Ze Naliupet emgasag ipal ebuan duailel unum awaremenin.  
 Guzenina, em ebuan duailel asiu go agal oiagab go en petak emenin.  
 Go Uwait nug koli Mesgai wag imai simai, wanib wag moroun.'

## 4

### *Polu ze abai maranemen dudu ipal zumam.*

<sup>1</sup> Uwait nugau Ah Wes nug ze araog guzenai aneu, aiu ses duailel ipal ag agal oiagab Yesus en petak emen, go utamamen. Guzenaimai, ag wes eg agal polu ze mui Satan nugau tibur agal ze mui sesamoramen. <sup>2</sup> Polumacanemen dudu ipal agen duailel polumaraimai, polu ze awaranem. Dudu go agal dabeleu *ain* zabeg go nug agareun sul, ag agal dabeleu eim ein igul naliu, ein igul

eg, ag i abiu. <sup>3</sup> Polumanemen dudu go agen du-  
ailel guzenai awaranem, 'Dudu ag ailel i egaran'.  
Goagen ag ee ipal i zabun abai maranem. Agal  
dabeleu ag Uwait nugau ameg ebu unu mui us-  
alamam aimai guzenanemen. Bo, ig abiu Uwait  
nug ee unum zabun migeun. Gonun, duair in go  
gonugau ougab Yesus en petak aimai, gonugau  
petak ze doimai, abe maimai, go Uwait 'Ese-e'  
auraimai, ee go unum zabun iboin. <sup>4</sup> Uwait nug  
ece unum usalai meun go naliu. Ece eg tub dareu,  
gasag i hiacab. Bo, Uwait 'Ese-e' auraimai, ece  
unum wabun sag. <sup>5</sup> Uwait nugau Ze mui, nug  
auranem ebu ee unum Uwait nugau ameg ebu  
naliu usalina, ig zabun iboin.

*Yesus Kristus nugau salau du naliu.*

<sup>6</sup> Timoti, na Uwait nugau Ze umkoskos  
nanalaimai, ze go en nait ounab petak aimai,  
na umkoskos sesamore, gonun, na suban gusig  
tapai daimai, ze naliu e izan na sikut wai mizemin,  
oiagab petak emen dudu ipal awaremen, na  
Yesus Kristus nugau salau du naliu damam.  
<sup>7</sup> Bo, dudu ipal agen embigeg agal iman gingin  
mui, duailel agal dabeleu eim iman gingin gaul  
macanemen mui, maranemen, na dudu go abai  
i dan. Go iman gingin Uwait nugau dabeleu  
i sesamoralem. Na Uwait nugau igul naliu  
umkoskos suban sesamoraimai, gonugau salau  
du naliu usalamam. <sup>8</sup> Na abiu ig igual enimig  
gusig mabun salau manem, go nug ig ginampet  
isanigamau. Bo, ig Uwait nugau salau gusig  
mamam, go nug ig naliu pet isanigamau. Gonug

ig ulis em ebu awau damun, isanigamau. Aiu ses, ig Mesgai wag simai damun han, isanigamau.

<sup>9</sup> Iz ze go mem go petak pet. Duail el ze go doimai, oiagab petak abun iboin. <sup>10</sup> Ig gonugau ze sesamoraimai, salau gusig manem, einen, Uwait nug muzmuz awau daneu, go duail el unum imarabun dabeleu. Petak, duail el goagal oiagab go en petak emen go nug go imaramau. Guzenina, ig go en igual oigeb petak aimai, go nug ig imaigabun en gumei darem. <sup>11</sup> Na ze go duail el gusig awaraiba, suban abai maren.

<sup>12</sup> O Timoti, na silin mogoi, gonun, na dudu ipal patelaremen, na gaul du aimai enim ebu ze i mamam. Na igul naliu pet memen, Kristen zaiger ipal agal oiagab petak emen go nait igul uligaimai, sesamoramam. Na ze naliu mamam, na igul naliu mai damam, nait ounab nug go en noumamam, nait ounab Yesus en petak emen go gusig patamam, na igul eg ipal i mamam, igul naliu tutak sesamoramam. <sup>13</sup> Iz pigai i bitai na duail el Uwait nugau Ze nanalai maraimai, ze go suban sesamorabun awaraimai, zebigeg suban abai maramam. <sup>14</sup> Gusig go Uwait nug mizeun, go na i wagemen. Getal dudu banban agen goagal ebeag nait ggalin ebu maimai, na en Uwait aurina, go nug gusig go mizeun, gonun, na gusig go mui salau mamam.

<sup>15</sup> Gonun, igul naliu go i uten. Na igul go suban sesamoreiba, nait ounab salau go en noumen. Guzenaimai, na salau suban menen, duail el agen nait salau naliu usalaba, pimam. <sup>16</sup> Na nagtal nait igul suban gumeiba, nait duail el abai marabun salau go suban men. Na salau go suban memen,

salau go eim Uwait nug na imaizeimai, nait zaunar go nait ze doimai, sesamoranem go han imaramau.

## 5

*Timoti erunai Uwait nugau duailel gumaramau.*

<sup>1</sup> Timoti, na du ureg tub igul eg maba, i gusig ze auren, na nait memen ze iau auranem sul, du go han guzentel ze auren. Na nait apanar amaiar suban gumaranemen sul, dudu ipal han suban gumaramam. <sup>2</sup> Na nait anan isanuranem sul ailel ureg ipal han suban isanaramam. Na nait abianar isanaranem sul ailel ipal han suban isanaramam. Guzenemen, duailel ipal agen na igul eg macanemen aimai i ze mamam.

<sup>3</sup> Bo, wab ailel ag duailel ipal agen ag i gumarebiag na subantal gumaramam. <sup>4</sup> Bo, wab ailel ag agal geleagar ta, agal asanagar dabi geleagar asanagar go nagen go Uwait nugau igul sesamorabun abai maremen, go ailel go gumarabun suban abai maramam. Einen, getal ailel ureg go agen ag suban gumaremen sul, agen han koli go gumaramamen. Ag igul naliu go guzenina, Uwait nug igul go en ougab siksikaneu.

<sup>5</sup> In wab air go du tub nug gumab tam, go ece tamacag dareu, go gonugau ougab Uwait en petak aimai, umaum amban go umkoskos Uwait nug go isanorabun gumei daimai, Uwait aurai damau.

<sup>6</sup> Bo, in wab air go gonugau enib siksikabun dabeleimai, igul eg mai aidaneu, go nug 'Iz awau darem' aneu, bo, gonugau dorog go noumeun.

<sup>7</sup> Guzenaimai, na wab ailel goagal ug mui gusig ze go awaren. Guzenemen, duailel ipal agen agal

enimag ebu ze i mamam. <sup>8</sup> Bo, duair in go gonugau ug mui, atagul abai nugtal suban gumarab tam, gonugau ougab petak eun go nugtal uteu. Duailel ipal agal oiagab petak ab tam, ag igul eg go i guzenanemen. Guzenaimai, duair go agal igul eg banou pet.

<sup>9</sup> Na wab ailel ipal goagal wai houhou was olig (60) mab tam agal agau ebu goagal wanimag i sikut wai macan. Na wab ailel ipal goagal wai houhou was olig (60) go zilauroi, goagal wanimag sag sikut wai men. Guzenemen, oiagab petak emen duailel agen ereg gotulaimai, ailel go isanaramam. Ailel ureg go ag du tutak sag oi dacanemen. <sup>10</sup> Ailel go ureg mab tam ebu go salau naliu macanemen, gonun, duailel ipal agal ameagab ebu goagal wanimag naliu mui. Guzenai ailel ag agal geleagar suban gumaranemenin, ag uzan tuban duailel agal zaueim imarai beteimai, ee maranemen. Ag agtal agal wanimag i wag macanemen, gonun, Uwait nugau duailel agen suban isanaramam. Ag abu alina, agal aramag ze sil ulusai maranemen. Duailel ipal uhu mui agen isanaremen, go agtal umkoskos salau naliu macanemen. Guzeneneg ailel sag agal wanimag sikut wai men.

<sup>11</sup> Bo, wab ailel ag ureg pet mab tam, agal wanimag i sikut wan. Einen, agal oiagab asaimai, koli du awau wabun dabeleu usalaba, ag Kristus semuramamen. <sup>12</sup> Guzenaba, ag amegai Kristus dual gonugau salau mabun baib memen kuatamamen, gonun, ag Uwait nugau ameg ebu ze a. <sup>13</sup> Igul go tutak tam, ag wasig wagena, duailel ipal agal zaueim beu beten alen ai, aidanemen. Bo,

ag igul eg go sag i macanemen, ag duail el ipal agal enimag ebu ze mai aidanemen, ag duail el ipal agal salau en enimag ebu gaul ze ze mai aidanemen. Igul go guzenanemen go naliu tam.

<sup>14</sup> Guzenaimai, ag wab ailel ag ureg pet tam, ag koli du awau oimai, mogoi tub soligwaimai, agal zau suban gumabun awaranem. Ag igul naliu go guzenebi, igual iwai zaiger agen Kristen duail el enimag ebu ze i mamam. <sup>15</sup> Na abiu, wab ailel ipal agal oiagab petak emen, igul go uteimai, go Satan nugau igul sesamoremenin.

<sup>16</sup> Duair in go ougab petak eun gonugau ug eim wab ailel dabi, nugtal wab ailel go suban gumarai damau. Go Kristen duail el ipal wab ailel go gumarabun uhu i maramau. Guzenebi, Kristen duail el ag gotulaimai, wab ailel ipal agtal bisomagar aimai, isanaramamen.

<sup>17</sup> Kristen duail el agal gumaremen dudu go salau naliu mebi goagal wanimag wag maraimai, salau go ebu an ece maran. Du inug Uwait nugau Ze duail el awaraneu mui, du inug gonugau ze abai maraneu mui, agen dudu go suban gumaraimai, ece naliu maramamen. <sup>18</sup> Einen, ig abiu, Uwait nugau ze nug guzenai aneu,

“Bulumakau nug wit dab tapaba tapaba, gonugau ogusau i kiai macan. Wit dab ipal utebi, zimau.”

*Lo 25:4*

Ig abiu, “Salau du go gonugau salau meun go aiwag umau.”

*Luk 10:7*

<sup>19</sup> Timoti, du tub nug na ze aizamau, “Igual gumiganeu du go igul eg tub meun.” Guzenai aizaba na gonugau ze i don. Bo, dudu aliag ta, dudu ainarai agen gonugau igul uligemen guzenai

aizebi petak na goagal ze doimai, suban sisiamam. <sup>20</sup> Bo, gumaranemen dudu go igul eg mebi na dudu go imarai alai gumaranemen dudu ipal agal ameagab ebu gusig ze maren. Na igul go guzenemen, goagal zaiagar igul go uligaimai, igul eg mabun uminamam.

<sup>21</sup> Timoti, iz Uwait dual, Yesus Kristus mui, Uwait nugau tibur naliu mui, goagal ameagab ebu gusig ze e aizem, na suban sesamoren. Na duailel unum ebalagab igul tutak sag men. Na dudu banban mui, nait zaunar mui, sag i isanaren, duailel unum isanaren. <sup>22</sup> Na du tub Uwait nugau salau murabun tapai moroimai, gonugau gagalig pigai i paten. Dudu ipal go igul eg mebi na go abai i tulen. Na guzenemen, dudu ipal agen nait enim ebu ze tub i mamam. Na suban tapai daimai, Uwait nugau ameg ebu igul naliu sag menen.

<sup>23-25</sup> Dudu ipal agal igul eg araog guzenanemen. Guzenina, duailel ipal agen piaraimai, pigai sisiaramam. Bo, dudu ipal ag igul eg wageimai guzenanemen. Guzenina, agal igul eg go wageimai daneu. Bo, dai dai, aiu ses araog usalamau. Guzenaital, igul naliu go araog usalina, pianemen. Igul naliu ipal wageimai daneu, go unum i wageimai damau, aiu ses araog usalamau.

Timoti, na ulis ze sag i zen. Na wain ginampet ze ebu maimai, zenen. Gonug isanizeimai, nait bigun oug ebeu dareu amen pasaba, na ebeu umkoskos wanem utizamau.

## 6

<sup>1</sup> Salau duailel (*slev*) ag gumaranemen dudu agal piagsal daremen, ag unum agal gumaraneu

du banou nugau ze suban sesamoran. Ag igul go guzenebi, dudu ipal agal igul naliu uligaimai, ag Uwait ze biabial kuai i aoramam. Dudu go agen han ze go iguanag duailel abai maranem en ze biabial kuai i mamam. <sup>2</sup> Salau dudu (*slev*) agal gumaranemen dudu Yesus en oiagab petak emen agen guzenai i dabilan, “Igal gumiganemen dudu ag ulis Kristen usalemen, gonun, ag igual zaiger. Gonun, ig agal ze i sesamoramam.” Ag guzenai i dabilan, go igul eg. Bo, ag agal gumaranemen dudu agal ze suban sesamoraimai, agal salau naliu maramamen. Einen, go guzenai dabilamam, “Iguanag agal salau naliu maramam, einen, ag ulis Yesus en oiagab petak emen, gonun, ag igual zaiger, ig ag en oigeb nug noumanem.”

*Dudu ipal aiwag asi wabun polu ze abai maranem.*

Na ze e duailel abai maraimai, go ze go sesamorabun gusig awaramam. <sup>3-5</sup> Igal Dubanou Ban, Yesus Kristus nugau ze nug ig Uwait nugau igul abai miganeu. Du tub nug ze tub Yesus gonugau ze sul meun tam duailel abai maraimai ig abiu du go nugau wanib gaul wag macaneu, go karweun du sul. Go igul naliu mabun dabeleu i waneu. Kristus nugau Ze Naliupet en dudu ipal abai ze eim alalaneu, go ag abai umkoskos alalabun guzenaneu. Guzenaimai, igul gonug, duailel ipal ag agal zaiagar agal ece wabun oiagab alemen, ag ze eim alalanemen, ag dudu ipal agal enimag ebu ze biabial kuai macanemen, agal zaiagar en dabeleu eg wanemen, ag umkoskos ze ginigono anemen. Guzenai polu ze abai maranemen dudu



ag dabeleu eg mui, Uwait nugau petak ze omen suban abe i memen, gonun, utemenin. Ag guzenai dabilanemen, 'Ig Uwait nugau igul sesamoraimai, ig ece asiu umam.'

<sup>6</sup> Go petak, Uwait nugau igul unum sesamoraimai, ig oigeb siksikamam. Go igual ameg naliu om. <sup>7</sup> Em e ebu, igual anaiger agen solig igemen ziwass ebu, ig ece tub mui alab tam. Ig noumaimai, ece tub oi i bitamam. <sup>8</sup> Bo, ee ta, tibur galau ta, ginampet damau, go iboi. Ig oigeb siksikaimai damam. <sup>9</sup> Dudu ag ece asiu wabun anemen, dudu go ag Satan nug bimaiaag piaraimai, igul eg beu beu mamamen. Ag egun inain elet ebu nuanemen sul numamen. Igul eg beu beu go nug keuaraimai, unum eg maramau. <sup>10</sup> Aiwag asiu wabun oiagab nug alemen, go igul eg unum goagal bigeg. Duaillel ipal ag aiwag wabun dabeleu asiu oimai, agal oiagab petak emen go utanemen. Guzenaimai, ag uhu asiu pet oimai, agal oiagab eg pet macanemen.

*Pol nug Timoti Uwait nugau igul naliu suban patai dabun aureun.*

<sup>11</sup> Bo, na, Uwait nugau du, igul eg go unum uteiba, semoren. Guzenaimai, na igul naliu maimai, Uwait nugau igul sag sesamoramam. Na nait ounab petak emen gusig mabun, mui, na duaillel ipal en ounab noumabun, mui, na uhu umam ziwass gusig tapai dabun, mui, na duaillel ipal abai iau dabun mui, salau gusig men. <sup>12</sup> Oiagab petak emen duaillel ag dudu ece ameg wabun gurguranem sul. Na han gurguraimai, nait dorop muzmuz awau dabun gusig umam. Getal na duaillel

agal ameagab ebu izal oiab Yesus en petak em anena, Uwait nug na awau muzmuz dabun en ulizeun. Guzenaimai, nait dorop awau muzmuz dabun gusig patai dan.

<sup>13</sup> Iz na gusig ze aizamoroi. Ece unum awau dareu go Uwait nug usalai meun. Yesus Kristus nug Pontias-Pailot nugau ameg ebu gonugau ze araog aureun. Uwait gonugau nag Yesus Kristus dual ameagab izan na gusig ze go guzenai aizem.

<sup>14</sup> Na izal ze domen unum suban sesamore. Guzenemen, du tub nug na igul eg mem aizabun iborain tam. Guzenaital sesamorai betei igual Dubanou Ban, Yesus Kristus go alamau. <sup>15</sup> Yesus alabun ziwas, go Uwait nugtal tapai moroun dareu. Uwait go wanib banou mui, nug sag em ebuan duailel unum gumaraneu. Go emgasag gumaranemen dudu banban agal gumaraneu du banou, go mui dudu banban agal Dubanou Ban. <sup>16</sup> Go i noumaneu, go al hilanau banou ebu daneu, du tub nug al go waugab bitabun iborain tam. Go du tub nug getal piab tam. Du tub nug go piabun iborain tam. Ig gonugau wanib ulagwag moroimai, enab, go muzmuz gusig damau. Petak.

<sup>17</sup> Timoti, na dudu em ebuan ece asiu mui darem guzenai awaramam, “Ag ece asiu go en agal wanimag i wag macan. Ag ece go nug ag isanaramau aimai i dabilan, ece go unum pigai eg umau. Uwait nug ag isanarabun en gusig dabilan.” Nugtal ece naliu asiu igual oigeb siksikabun miganeu. <sup>18</sup> Na duailel ecesab asiu mui guzenai awaren, “Ag umkoskos igul naliu duailel ipal isanarabun macan. Ag oiagab siksikaimai, agal ecesab doun mizanaraimai, duailel ipal ecesab

tamacag maran.” <sup>19</sup> Ag igul naliu go guzenebi, agal ece asiu naliu Mesgai wag gotulamen, go aiu ses umamen. Guzenaimai, petak ag awau muzmuz Uwait nug dual naliu damamen.

<sup>20</sup> Timoti, Uwait nug na salau mizeun, salau go suban gumamam. Dudu ipal go Uwait nugau dabeleu sesamorab tam goagal dabeleu eiman polu ze macanemen, na ze go i sesamorenen. Dudu ipal agen polu ze maimai, Uwait nugau Ze mui alalanemen. Dudu go agal dabeleu eim ‘igual dabeleu naliu mui’ anemen, bo, goagal dabeleu naliu tam. <sup>21</sup> Dudu ipal ag igul go sesamoraimai, agal oiagab petak emen utemen.

Uwait gonugau ougab naliu eim ag isanaraimai, ag abai damau.

**Uwait nugau Ze Naliu**  
**The New Testament in the Kein Language of Papua**  
**New Guinea**  
**Nupela Testamen long tokples Kein long Niugini**

copyright © 2005 Wycliffe Bible Translators, Inc.

Language: Kein

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-13

---

PDF generated using Haiola and XeLaTeX on 21 Feb 2024 from source files dated 31 Aug 2023

7c8d8e69-f9a1-5ddf-9698-e3ef19204c55